

## **Fragmenta chirurgica et medica / [Sir William Fordyce].**

### **Contributors**

Fordyce, William, Sir, 1724-1792

### **Publication/Creation**

Londini : T. Cadell, 1784.

### **Persistent URL**

<https://wellcomecollection.org/works/ay7yua5e>

### **License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>



E. xv. e

18

Reudo in Christo patri  
Episcopo Landavensi  
auctor.



Handwritten text, likely bleed-through from the reverse side of the page. The text is faint and illegible due to fading and the texture of the paper.

FRAGMENTA  
CHIRURGICA & MEDICA.

AUCTORE GUL. FORDYCE M.D. EQ. AUR.

(William)



LONDINI:  
*Ex Officina T. Spilsbury.*  
PROSTANT APUD T. CADELL.  
MDCCLXXXIV.



22731



IOANNI ELIOT  
EQ. AVR. ET BARONETTO;  
MEDICO,  
SI QVIS ALIVS, IN IPSA SCHOLA  
HIPPOCRATICO-BOËRHAVIANA  
NATO;  
HÆC QUALIACVNQVE FRAGMENTA,  
HONORIS ERGO ET AMICITIÆ,  
L. M. D. D. Q.  
GVLIELMVS FORDYCE.



# L E C T U R E

2

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

JOHN BENT

# LECTORI

S.

QUUM a primis fere annis ad artem medicinalem præ ceteris animum adungere destinaram, ex ephebis egressus in id studii genus omni cogitatione incubui; auspice fratre, attentissimo olim magni Boërhavii auditore et discipulo. Tali duce, libros inter et ægrotos quotidie versans, passim conquifivi, ac totus in hoc eram, ut novi aliquid addiscerem. Quandocunque autem legenti, vel percontanti, sese obtulisset insigne aliquod ægrotantis exemplum,



plum, observatio quævis, aut significatio tantilla, unde clarior instituto adfulgeret lux, ea literis fidis continuo mandavi, ut ad normam postea, occasione data, singula exigerentur. Quæ tunc adnotare exorsus eram, volventibus annis, cum crebra recensione magna cepere incrementa. Multa enim didici ex nosocomiis tam peregrinis quam domesticis : plura suppeditavit propria et publice et privatim per longam annorum seriem experientia.

Nunquam mihi per otium concessum est theorias subtiles subtiliter texere ; neque illuc profecto animus nunc fert, quippe  
 quæ

quæ magis curiosæ mihi semper  
visæ sunt, quam reipublicæ medicæ  
unquam fructuosæ. At vero de  
iis, quæ docuit usus diutinus (qua-  
lia ea cunque sint) cepit deside-  
rium junioribus impertiendi, qui-  
bus in iisdem studiis eadem obtige-  
rit animi intentio, idem ardor.

Libellus FRAGMENTA tantum  
audit. Ea certe licuit domi pres-  
sisse, dum in formam justî ac legi-  
timi operis, quæ in medium habeo  
proferenda, maturuissent; sed nego-  
tiis in dies districtior, et acer-  
rima febrium malignarum vi sæ-  
pius admonitus quam caducæ sim  
et incertæ vitæ, satius credidi par-  
tem



tem in præsentia vulgare, quam in longinquum tempus omnia differre.

Recte statuerim, an fecus, aliorum est judicium. Juvat interim recolere, cives nostros, quorum animum benignum plus semel expertus sum, haud omnino adspernaturos conamen aliquod, utcunque leve et exiguum, unde generis humani dolores aut amoveantur aut fubleventur.

Dabam Londini

Prid. Id. Dec.

M. DCC. LXXXIV.

FRAGMENTA  
CHIRURGICA  
ET  
MEDICA.

ABSCESSUS JECINORIS.

**E**Duardus Stanfell, tertiæ cohortis prætorianæ miles, vicesimum agens annum, febre biliosa ineunte mense Septembri correptus est : nec in valetudinarium cohortis nisi post dies quatuordecim deferatur, febre jam onustus, cum ictero superaddito. Rhabarbari ope, salium neutrorum usu, vomitu, &c. se remisere febrilia symptomata ; rediitque corpori color  
B  
suus.



suus. Mansit tamen circa regionem hepaticam, vel gastricam, dolor quidam vix unquam cessans. Ibidem porro loci gravitatis sensus erat præter consuetudinem. Jamque febris accessio postmeridianis ac vespertinis horis urgere cœpit; quæ utique proxima luce, ut in phthificis fieri consuevit, in effusum sudorem abiit. Cum crescente in dies dolore ortus est intus tumor; graduque concitato æger emarcescebat. Tumor in exteriorem partem magis magisque ferebatur. Figura ejus rotunda; pressus vero digitis nusquam cedebat. Vir jure magni nominis Gulielmus Hunter, qui rogatu meo hominem invisere dignatus est, in eandem mecum concurrit opinionem, materiam aliquam malam corruptamque in hepate coisse, quam ferro forsitan contingere liceret. Ægrum adeo monuimus, quanto vita in periculo esset, quamque nulla de salute reliqua foret spes, ni chirurgi in manus omni abjecta

abjecta mora se tradidisset. Neque abhorrebat ille, miles impiger. Secans igitur per oram lineæ rectæ a parte dextra, ingenti puris fœtidi copię exitum præbui: quo emissio, cannulam plumbeam in cavitatem inserui, superdatis postea solitis glutinantibus. Corpus quam citissime pristinam magnitudinem implevit. At vero a cibo, aut post quotamcunque intemperantiam, venter inflatus atque distensus fiebat; omnino ac si residua jecinoris pars (pars illa qua nihil abscefferat) necessariam bilis copiam non esset sufficiendo. Quod in isthac minus erat, rhabarbaro pensavi et extracto chamæmelino, per temporum intervalla exhibitis. Elapso sesquimense, sanatum est vulnus; inflatio omnis resedit; et salus absolutissima subsequuta est.



## ABSCCESSUS JECINORIS,

PER DIAPHRAGMA IN PULMONEM PENETRANS.

**N**Auta quidam, cui nomen Bertrand, dum in reditu ex India Orientali promontorium Bonæ Spei præterveheretur, gravi dysenteria implicitus erat. Is me convenit mense Januario M,DCC,LXXII; quo tempore, ex sudoribus nocturnis, purulenta expectoratione, ac febris hectica, laborantis phthisi pulmonali speciem dabat. Sex ante me conventum hebdomadas detractus fuerat sanguis: id quod in malo pleuritidem referente paulo serius fiebat. Intra diem enim quartum decimum solita phthiseôs pulmonalis signa morbus repræsentabat. Prodebat sese præterea tensio in hepatis regione; item tumor inter secundam ac tertiam lateris dextri costas nothas. Hunc tumorem, quoniam ab inclusa in cavo thoracis materia proficisci videbatur, mihi visum est et Joanni Hunter pure exonerandum esse. Cui medicinæ  
quum



quum artifex ille eximius postridie, me comite, accinxisset ; ecce exscreantem ægrum rufæ multum purulentæ materiæ, acerba simul divexante tussi. Nihilo tamen fecius optimum factu duximus apertionem tumoris instituere ; quippe quum non liquido pateret, illi virium satis suppetere ad tantam materiæ copiam extussiendam. Dempti sunt optime cocti puris ad sextarios quatuor ; costæque ora cariota reperiabatur. Anhelosæ respirationis, itidem purulentæ expectorationis symptomata, in auras dissipata sunt : dormiebat quoque æger plus minus. Ut feбри subveniretur, nitrum sumpsit ex mixtura salina Riviana, cum elixire paregorico, et eclegmate molliente balsamico. Sibi vero nullo pacto temperare voluit, quo minus carne, ostreis, cerevisia forti, et quæ similia sunt, vesceretur. Ora vulneris inter hæc malam faciem induebat : deciderunt escharæ : idque quod se promebat, sanguineum, faniosum, purulentum, per vices erat. Perfliterunt



stiterunt hecticæ symptomata: respiratio venæsectione relevata est: ad intervalla venter resolutus, stercore hic illic materia interstincto. Martiis calendis sequuta est mors. Die postero, dum intestina secti cadaveris lustraremus, materiam usquequaque in jecinore sparsam deprehendimus. E costis duæ in longitudinem usque duorum vel trium digitorum computruerant. Et, quæ animadversione dignissima res est, jecur diaphragmati arcte adhærebat; per quod in dextri pulmonum lobi partem pus sibi viam eroserat: constabat enim, abscessum pulmonis priori in jecinore abscessui ortum debuisse. Aliæ et erant in jecinore suppurationes minores, quibus nulla cum majori intercesserat communicatio. Cetera viscera omni labe carebant; induratis duntaxat mesenterii glandulis.

Talium forte suppurationum interpositu hydatides e cavo abdominis per tracheam alias transmissæ sunt. \*

\* Vide Medical Transactions, vol. ii. p. 486.



## ÆGRITUDINES AD ANUM.

**V**ariæ sunt et molestissimæ ad anum ægritudines. Earum præcipuæ, cum aptissima cuique curatione, sequuntur.

1. Prurigo intoleranda, cum ardore, et acri profluente ichore : cui malo in totum tollendo vix dum innotescit remedium. Plus illi quidem ex Heisteri, quam ex alius cujusvis præscriptis, levamenti est. Istiusmodi pruriginem, nullo eam profluvio ichoroso comitante, novimus interdum sanari lacrimis stanni Cornubiensis in pulverem redactis, vel ipsa limatura ejus. Hoc idem docet honoratissimus olim materiæ medicæ præceptor meus Carolus Alston.\*

2. Rhagades lue venerea derivatæ : quæ haustis ex radice farsaparillæ decoctis sanationem debituræ sunt, si modo rite præcefferit

\* Medical Essays, vol. v. p. 89.



cefferit hydrargyrosis. Vide quæ de hac re alibi exequutus sum. †

3. Ulcera vetustiora tortuosa cum fistulis, ex eadem lue male in perinæo curata ortum ducentia: quibus optime succurritur asperiore regimine antivenereo, cereolis, rusticatione, ac victu pleniore.

4. Ulcera vetustiora tortuosa cum cachexiæ symptomatibus: quorum omne auxilium petendum est a pastillis, quos in remedium fistularum confecit celebris medicaster, quem nuper vidimus, Joannes Ward, Equo vehi sub his licet, aliove modo se exercere. Nulla interim partis affectæ, nulla de cibis, interponenda est cura.

5. Hæmorrhoides in turgido statu colliæ, sic ut dolorem intolerandum efficiant: quas tamen sæpius pelli videre est per simplicem incisionem, nulla partis affectæ habita ratione, neque imposito aliquo penicillo.

6. Hæ-

† Appendix to Review of the Venereal Disease.

6. Hæmorrhoides jam in pus vergentes, cum dolore vehementissimo, simul et durtie ad ora venarum: quod ut submoveatur vitium, copiose per lanceolam evocandus est humor noxius, prius etiam quam maturentur capitula. Omne penicillum alienum est.

7. Ani procidentia, ab imbecillitate musculorum oriunda: cujus efficacissimum positum est remedium in fomentis ex aqua, in qua candens ferrum subinde extinctum fit, et cortex quernus decoctus. Utilissimum quoque vinculum est a Benjamino Gooch repertum. His autem addantur tincturæ Thebaicæ injectiones, si ex affectuum dysentericorum reliquiis in intestinum rectum regestis ortum sit malum.



## A S T H M A.

**F**LOYERI tractatus de variis hujusce morbi speciebus unus solus pluris habendus est quam reliqui omnes super eodem argumento conscripti libri.

In purulento genere, quod fere senum est, quæcunque urinam movent adprime conveniunt: qualia sunt gummi ammoniacum, millepedæ, et scilla. In genere nervoso, nihil æque prodest atque cortex Peruvianus. Recte dantur, in hysterico, solutiones e gummi.

Pauci sunt suspiriosi, qui vitam omnino sufferre possunt in hac urbe, spirante, dum ardet Sirius, vento austro-occidentali. Repentinas cœli mutationes plerique omnes nimium sentiunt.

Acetum et oxymel scilliticum, mirum quantum polleant, five separatim sumpta fuerint, five aliis juncta medicamentis,  
nitro



nitro puta vel cortice Peruviano; maximeque ubi noctu fiunt accessiones.

In omni hoc affectu, ut ne quid in victus ratione peccetur, summa cautio est. Ex traditis mihi ægris nonnullos vidi quasi mox jugulandos, nisi potui datum esset acetum aquæ frigidæ mistum.

#### CALCULUS VESICÆ FELLEÆ.

**M**Atrona Francesca Stewart in Cavendish-square habitabat. Hanc, podagrica stirpe genitam, alvus tardior biliosque affectus per maximam vitæ partem infestayerant. Sub mensium tandem cessationem, vehementissimis laceßita vomitionibus, arquata evasit; paucasque intra hebdomadas, sævis nunc circa regionem gastricam sollicitantibus spasmis, graviterque vexantibus bilis flavæ acrioris dejectionibus, piriformis illa calculi dimidium excrevit. Cessabant simul symptomata o-



omnia. Post aliquot dies, quum summa animi hilaritate cibo pleniori indulgeret, subito exclamans "Proh latus meum!" manum dexteriori regionis hypogastricæ parti admovit, animamque efflavit.

Causam mortis tam inopinatæ cultro anatomico requirens, ductum choledochum inveni crassitudinem vesicæ felleæ prope habentem: calculus enim, quamdiu hisce in locis morabatur, utriusque cavo impleto, ad utriusque figuram plane conformatus erat. Id vero quod maxime notatu dignum est: Reliqua calculi pars, dum per coli valvulam iter moliretur, subitaneam acrimonia sua, ut videbatur, convulsionem excitaverat, unaque intestinum ruperat; cujus in vulnere pertinaciter infidebat, non deficiente tamen ad sensum satis amplo transeundi spatio. Inventus quoque est intra pelvim tumor scirrhusus pugni magnitudine, qui adstrictionem istam alvi, unde antea tot cruciatus, forsitan adauxerat. Nulla alia erant noxæ signa.

Veri-



Verisimile est, bilem cysticam, simul cum descendente calculi parte rapidius erumpentem, tantis illis inter profluvium doloribus in causa extitisse.

Ex eo quod altera pars calculi intestino rupto mortem statim adtulerat, minime mihi dubitandum videtur, fata acerba tot infantum, nervorum distensione abreptorum, acriori cuidam in ventriculo aut visceribus materiæ deberi, intestinorum tunicas eodem fere modo subito afficienti; quas quidem tunicas apertis cadaveribus sæpenumero vidi aliquibus in locis quasi elixas.

#### CAPITIS DOLOR.

**M**ILES tertiæ cohortis prætorianæ, cognomento Green, in valetudinarium exceptus est anno M,DCC,L, atroci cephalalgia tentatus. Ei primum pertusa est vena; deinde vomitoria, purgantia, et cum diluentibus

entibus nitrosa, in usum vocata sunt. Quæ omnia quum nihil proficerent, emplastro vesicatorio dorso injecto, et adjuvantibus radicis valerianæ silvestris dosibus, ante emensam hebdomadem liberatus est.

## §.

Uppinghamiæ Franciscus Bennett, quum triginta tres annos haberet, gravissima laboravit cephalæa, ne semel unquam per sex menses dimittente. Continuata demum duarum integrarum hebdomadum vigilia, auctores fuerunt amici, ut fronti, qua maxime parte urgebat dolor, hirudines adfigerentur. Quod adeo factum est. Magna dein copia sanguinis sequente, altus illum occupavit sopor. Experrecto tanta iterum copia manavit sanguis, ut æger rime sisteretur.. Nunquam postea indoluit ei caput, etiam ex hesterno Iaccho; ut ipse monuit septuagenarius.



## CINGULUM MERCURIALE.

**F**ILIA calcearii cujusdam Woodcock, in Glaston vico Rutlandiæ degentis, scabie contracta, remedii loco cingulum induta est, quo exceptum erat argentum vivum; nullo ante diem tertium oriente incommodo. Tum vero insigni angore, et angustiis circa præcordia, correpta est; invadentibus frigidis sudoribus, nausea, capitis dolore, ac nervorum ad tetanum usque distensione. Duraverunt ea omnia per totam istius diei noctem; in tantum quidem exacerbata, ut ad ultima jam prope ventum esset. Sanguinem floridi coloris effuse vomuit, duasque minimum sanguinis concreti libras per vulvam emisit: nec mediocre per alvum ejusdem erat profluvium. In tam præcipiti periculo arcessitus, multa sciscitando, ac de veneno et veneni effectibus, ut verum elicerem, pluribus

pluribus differendo (me enim rem actam celaverat tota conscia familia) tandem eam comperi zona cinctam mercuriali. Qua statim exuta, haustum affatim obtuli, qui habet Olei amygd. dulc. unc. vi. Lact. recent. tepid. lib. vi. His vomitu redditis, bolum ex aquæ menthæ cyatho exhibui, in quo erant Camph. gr. v. Flor. sulph. gr. xv. Theriac. Andromach. gr. x. Conserv. flor. lavendul. gr. xx. Victum quoque lacteum jussi cum pulvere testis contritis. Notandum est, rejecisse illam cum lacte oleoso sanguinem concretum; unde valde sublevata est. Diebus quinto et sexto, molestiarum nihil; concreti vero sanguinis haud parum dejecit, adjuvante medicamento aperiente. Die septimo, ad libram sanguinis floridi denuo refudit. Iterum lacte oleoso usa est, multo cum fructu. Quum a pulvere testaceo lacte temperato abhorreret stomachus, ad jura se recepit, et convaleuit.



## CARCINOMA sive CANCER.

**C**ancer exulceratus, ob summum cruciatum, foedum odorem, et necessitatem morbum alendi, cujus unquam sanandi spei nihil est, tantum habet terrorem, ut de efficaci remedio exquirendo studiosissime meditari debeat benevolus quisque.

Ubi nullum ulcus accessit, lancinantes autem quos vocant dolores sentiri occurrunt, morbum saepius dissipavi cicuta intus data, vel extrinsecus adhibita. Cicutam utendam esse censeo in omnibus ejusmodi casibus, uti moris est Germanorum.

Impositum medicamentum Plunkettianum (ex arsenico id esse reor) mederi vidi, quum ulceris diametros non nisi digitum pollicem haberet, neque scirrhus se latius diffudisset. Vidi quoque ex interno ejusdem usu pessima nasci symptomata. Quin imo fide testis locupletissimi certo scio,

D

majori

majori id impositum superficiei, quam cujus mentionem fecimus, tanquam toxicum occidisse.

Ulcera cacoëthica, quæ in nosocomiis pro carcinomatosis habita fuerant, haud raro cedere novi idoneis medicamentis immutantibus, vel aptæ victus rationi.

#### C I R C I N U S.

**F**ACILE discernitur circinus ab alio quovis cutis vitio. Ejus hæ sunt notæ. Partem alteram colli, vel thoracis, vel hypochondriorum, vel abdominis, in cinguli modum occupat, exanthemata habens aquosa, pustulis his similia, quæ confluenti potissimum variolarum generi propriæ sunt. Biduo ab eruptione turgescunt hæc exanthemata rubro, cyaneo, vel purpureo ichore. Magna adest inflammatio, ingens itidem dolor, cum angore quodam, animique victi atque oppressi sensu, quam putrida sit illorum indoles liquido manifestante.

In



In morbi hujus remedium, præclaros novi medicos iteratam præcipere sanguinis missionem, victum parcissimum, diaphoretica, &c. atque ea ipsa per plures dies continuari. At talem frustra consumi operam usus evincit. Serpit enim usque circa corpus malum, eo plus ægrotanti formidinis incutiens, quo magis apud vulgus inveteravit opinio, statim circinum interimere, simul ut orbem suum confecerit.

Efficacissime sanat corticis Peruviani drachma una, ex vino rubro Lusitanico, vel vetere Rhenano, quater quinquiesve in die sumpta.

Si vitiis istis, quæ summa corpora deturpant, majorem medici curam vellent impendere, certius illi multo de humorum statu judicium ferrent.

#### COLICA.

**J**AM ab adolescentia opportunior eram ventriculi et intestinorum inflationi. Quæ mea valetudo postea in pejus vertit



ex eo quod sequutus sum vitæ genere ; unde nimirum cælo nocturno expositus eram, imbribusque sæpissime membra madefactus. Neque hercle ad sanitatem conferebat, quod de idoneo interea corporis vestitu parum essem sollicitus.

Abhinc annis triginta septem, mense Januario, a frigore inter equitandum suscepto, invaserunt dolor ac distensio intestinorum ; præcipua morbi sede ad coli valvulam se habente. Sublatum quidem est id malum, haud tamen levi momento, rhabarbari tincturis, infuso florum chamæmeli, oleo ejusdem essentiali quod dicitur cum saccharo contrito, et injectis clysmatis spiritum pellentibus. At Februario insequente, iisdem manentibus causis, eadem repetebat ægritudo ; nullo ab iis quæ supra posita sunt impetrato auxilio, nec a jalappa, neque ab opiatis. Immisso tandem enemate fortiori ex vino antimoniali, sale marino, infuso florum chamæmeli, et oleo e lini semine, iterum convalui. Vix vero  
tertius



tertius præterierat mensis, quum graves ingruerent spasmi una cum intoleranda tensione; unde abdomen perinde ac si fustibus cæsum relinqueretur, ut summis digitis per aliquot dies sine dolore nequiret attingi.

Quum Augustæ Taurinorum peregrinarer anno M,DCC,L, et nocte concubia aggrediretur vetus illa pernicies, pilularum massam, quam in aliud concinnaveram, casu in cubiculo fortitus, eandem experiri volui, siquidem nulla aliunde erat in præsentî adlevationis spes. Hujus massæ grana quindecim devoravi, et horæ circiter unius spatio exoptata omnia inveni, cruciamenta ablegata, spiritumque liberius transmissum.

In Angliam post paulo reversus, quotiescunque a frigore admissio, seu a potu vel cibo alieno, minimas molestias exhiberet aut intestinorum inflatio, aut dolor ad colicam valvulam, ad idem confugiens remedium, illico redintegratus sum.

Quid præstiterit hæc medicina sub titulo  
Pilularum



Pilularum Stomachicarum [The Stomach Pills] magis innotescit, quam ut novo repertoris præconio indigeat. Europa, et utraque India, singulares earum virtutes jam diu testantur.

Compositio tamen ipsa, quantumcunque utilis, nonnihil deficit. Nimium enim calorem sæpe ciet, et nonnunquam incipientibus hæmorrhoidibus locum præbet; adeo ut pluribus in casibus, quibus alioquin subveniat, novi aliquid suboriatur mali. Longior forsan dies, majorque pharmacorum virium notitia, hæc incommoda antevertere docebunt.

Gaudete interim, quotquot estis benevoli, tandem aliquando compertam esse pilularum formulam, quarum ope non exsomnes tantum, nervosisque pathematibus affecti, dulci sopore detinentur; hypochondriaci, melancholici, ac maniaci reficiuntur; sed et qui Cereri et Baccho sacra intemperantius peregerint, torquentium vigiliarum requiem placidissimam inveniunt.

Stultæ



Stultæ credulitati utcunque fraudem faciant ignorantia et impudentia, pestem nefarie corpori inferentes, dum nihil nisi sanitatem præ se ferunt; ausim tamen sperare, neutram mihi harum vitio versum iri, ex eo quia pilulas ita commendo quarum auxilio non ipse solum crebro levatus sum, sed et proximi amicorum, et intimi familiares, et alii cujusque ordinis quamplurimi, a colico dolore sæpenumero revaluerunt.

#### DYSENTERIA.

**S**UB exitum anni M,DCC,L, plures e militibus tertiæ cohortis prætorianæ, in arce Londinensi præsidium agentibus, occupavit dysenteria endemia. Tentata sunt, qua vulgò exhibentur portione, radix ipecacoanhæ, vomitoria alia, rhabarbarum, &c. quæ, parca adeo manu exhibita, falsum me iterum atque iterum habuerunt.

Idcirco

Ideirco bis die præbui, ex cochleari spiritus vini Gallici, a decem ipecacoanhæ granis ad quindecim, prout ferebat ægri stomachus vel languidior vel valentior : Et hinc quidem morbus celeriter solutus est. Medicamentum hoc sumpserunt Craddock et Pigler, in lectulo cubantes, capitibus cervicali quasi defixis; quo factum est, ut tanta licet potione vix vomitus eliceretur.

In vulgari dysenteria inflammatoria, credo equidem, tria vel quatuor ipecacoanhæ grana, totidem rhabarbari granis admista, si bis vel ter die ex exigua aqua menthæ fumantur, plus profutura, post commodas evacuationes, quam alia ulla medicina, cujus aut ipse periculum feci, aut alii laudes cecinere.

Quod ad choleram pertinet, vomitum ac ventris fluorem frequentissime compesci vidi, præsertim in grandævis, solo spiritu vini deflagrato; idque ceteris quibuslibet rebus nihil valentibus.

Magna adversus diarrhœam putridam  
acidorum



acidorum vis est cum opiatis conjunctorum; quod ipsum confirmat magnificus Störck, Ann. Med. Prim. p. 74.

Femina quædam Ward quadragenaria, apud Brighthelm in agro Leicestriensi ætatem degens, alvi sat molestum per sex menses passa fluxum, demum convaluit haustis tribus aut quatuor aquæ e vicino fonte Nevillensi congiis, ad methodum a Thoma Short monstratam in sua Aquarum Mineralium Historia. Neque rhabbaro, neque adstringentibus, obtemperaverat morbus.

#### FEBRES INTERMITTENTES.

**I**N omni febrium intermittantium genere haud raro cernitur, locis præsertim demissis paludosisque, corticem Peruvianum, quam scitissime etiam adhibitum, ex animi tamen sententia non succedere.

Istud sæpius mihi contigit observare, quum in agro Rutlandiensi versarer apud

E

fratrem



fratrem olim dilectissimum ; de quo veri ratio, amorque fraternus, prædicare cogunt, et summo cum ingenii acumine fuisse præditum, et vitæ integerrimum, et artis mendendi peritum, quo alium quemquam vix noverim peritiorem.

Dum in medicas inquisitiones una simul operam daremus, incidit forte in manus liber quidam, paucis notus, et paucioribus lectus, qui inscribitur Pharmacologia Anti-Empirica ; titulo is Latino, at vernaculo sermone conscriptus a medico sagaci Gualtero Harris. Refert ille, se in intermittentibus universis, quotiescunque cortex voto non respondisset, tali feliciter usum esse pulvere, qualis est pulvis Cornachini ; post deinde dato haustu Deckerfiano. Idem mox ipsi aggressi maximum operæ pretium brevi cepimus. Ex eo adeo tempore ad hodiernum usque diem, annos quatuor et triginta, eandem servare methodum in multis casibus obstinatis assidue persto ;  
tamque



tamque insigni cum felicitate, ut vix hebdomas prætereat, quibus anni tempestatibus ejusmodi dominantur febres, quin unum et alterum hac sola insiftens via ad sanitatem reducam.

“ Et tertianas abegi,” ait scriptor,\* “ et quartanas, medicamento purgante ac portione quæ sequuntur; hisque interdum simplici tantum vice propinatis. Ignorari autem non oportet, permagni id interesse, quo protinus tempore eadem ministranda sint.

“ R. Antimon. diaphor.

Cryfall. tart.

singulorum scrup. i.

Diagryd. gr. xii.

Croc. opt. pulv. gr. iii. vel iv.

Misce. F. pulvis, in cochleari vini albi, vel aquæ alicujus cardiacæ, v, vi, vel viii horis ante paroxysmum exhibendus.

“ Eundem

\* “ I have cured both tertians and quartans with  
“ the following purge, and potion, and that some-  
“ times upon the very first exhibition; only the cir-  
“ cumstance of timing it is of no small moment.

“ R. Antimon. diaphor. &c, &c, ut supra.



“ Eundem fere pulverem præscriptum legas apud Margravium (nuncupatur is Pulvis Febrifugus egregius) quem in jure pulli gallinacei fumendum suadet auctor, duabus ante impetum interpositis horis. Ego vero mallet quinque, sex, aut octo intercedere horas; eo nempe consilio, ut prius purgatio absolvatur, quam accessio accedat. Pulvis Comitissæ Warvicensis, seu Pulvis Cornachini, ejusdem prope est naturæ, atque ex iisdem ferme elementis compositus.

“ Huic tamen pulveri non unice confusus,  
et

“ You may read much the same sort of powder in  
“ Margrave’s *Materia Medica Contracta*, and called  
“ Pulvis Febrifugus egregius, which he advises to  
“ give two hours before the fit in chicken broth. But  
“ I have rather chosen five, six, or eight hours,  
“ before the time of the fit, that the purge might  
“ just have finished its operation before the ex-  
“ pectation of the paroxysm. The pulvis Comitissæ  
“ Warvicensis, or Pulvis Cornachinus, are much of  
“ the same nature, and ingredients.

“ But not trusting to this powder alone, and  
“ con-



et mecum versans, quam opus sit cardiacum post tantam istiusmodi cathartici vim, tanto præsertim in paroxysmi cito adfecturi discrimine; necesse ut plurimum duxi tale quid cardiacum, vel haustum febrifugum exhibere, quale reperire est inter notas ingeniosi Deckerfii in Praxin Barbettianam.

“ R. Aquæ card. benedict. unc. ii.

theriacal. simpl. drachm. ii.

Sal. absynth. drachm. semiss.

Spirit. sal. ammon. scrup. semiss.

Syrup. papav. errat. drachm. iii.

Misce. F. haustus.

“ Hunc

“ considering how requisite a cordial often is, after  
 “ a purge of this strength, and especially at such a  
 “ critical time as that of the paroxysm, so soon succeeding, I have generally thought it necessary to  
 “ give some such cordial, or febrifugous draught, as  
 “ is mentioned in the notes of the ingenious Deckers  
 “ upon Barbette’s Practice.

“ R. Aq. card. benedict. &c. &c. ut supra.”

“ This



“ Hunc itaque porrigo, certe haud  
abfimilem, haustum, circa tempus ac-  
cessionis, aut ante eam unius fere horæ  
spatio. Neque memini, me, curatione  
hac adeo in proclivi vernas tertianas ac  
duplices tertianas profligare cupientem,  
eas non profligasse. Enimvero raro fallit  
in intermittentibus autumnalibus, modo  
bis terve repetatur.” Haftenus vir sagax  
Harrifius.

Ad illa et hoc accedat, me medicinam  
hanc sanare novisse, etiam quum non pur-  
gaverit; me quoque semper præcipere, ut  
multa veste opertus paroxysmum in lectulo  
opperiatur æger, haustu Deckerfiano, an-  
tequam

---

“ This, or some such draught, I do use to give  
“ about the time of the fit, or an hour before. And  
“ I cannot remember, that I have once failed to cure  
“ the vernal tertians, and double tertians, by this  
“ easy method. And it is but seldom that it will  
“ fail in the autumnal, especially if repeated two or  
“ three times.” Pharmac. Anti-Empir. p. 176.



tequam redeat horror, nequaquam prætermisso, tametsi per alvum nulla facta fuerit evacuatio.

Elizabetha Freeston, in Great Ayston, annum agens decimum sextum, in quartanam incidit anno M,DCC,XLVII. Phrenitis eam in autumno occupaverat; quartana autemprehendit eo qui sequutus est Novembri. Pulverem sumpsit Cornachini, alvo præter solitum nihil reddente. At tamen per hebdomadas sex morbo vacabat: quibus exeuntibus reversa est febris. Post administratum diu et incassum corticem Peruvianum, idem est repetitus Cornachini pulvis cum haustu Deckerfiano; qua curatione febris in exilium acta est. Exanthemata quædam, cicatricularum instar e variolis, per totam faciem prorumpebant, manebantque. Virgo vero usa est secunda valetudine.

Famulus viri cujusdam reverendi Gueft, apud Seaton, pulvere Peruviano inutiliter cum theriaca per sex menses adsumpto,  
pulveris



pulveris usu Cornachini in totum restitutus est, mense Augusto M,DCC,XLVI. Nec ventriculum, nec alvum, quam minime moverat pulvis; sed officio suo specificè, quod dicitur, satisfaciebat. Dire vexatus fuerat hic æger.

Vere possum adfirmare, post centena plus pericula, maxime ubi cortex Peruvianus parum valuerit, successum hujusce medendi rationis unicuique alii longe antecellere, cuicunque ea sit, undecunque petita, quacunque nitatur auctoritate.

Qui alia in hujusmodi valetudine medicamenta velit celebriora, is adeat Riverii antiquarium, Baglivium de sale ammoniaco crudo, et de floribus chamæmeli, Hoffmanni electarium, necnon Boërhavii antipyreticon raro fallens.

§

Præbui frequenter theriacam Andromachi, sicuti Galeno mos erat; adjecto succo limoniorum, vel semuncia haustus salini.

Vix



Vix ausim in medium proferre, quantopere me attonitum habuerit, post Sydenhami et Mortoni tantorum virorum testimonia, corticem videre sincerissimum Peruvianum, ex ipsorum præscripto adhibitum, plurimis meis ægris vix quidquam aut nihil prodesse. Quod sic moneo, ut tamen fatear, minime me fugere quam nobile sit antidotum hic cortex, cui confidere liceat in casibus aliquando tantum non deploratis. Cujus rei subjicio exemplum, adnotatu cumprimis dignum.

Mense Augusto calidissimo, Joannes Wright in vico Lidington agricola, quum octo et quadraginta annos compleisset, febrem nactus est quam nervosam appellant, illic forte viciniæ epidemice grassantem. Quæ in re tali fieri adsolent, omnia tentata sunt, nec irritò conatu; transibat enim febris nervosa in intermittentem tertiani generis, quæ per duas

tresve accessiones merito quidem ordinatis posset adnumerari. Deinde vero frigus acriter adeo invasit, ut horas minimum sex septem homo sine sensu ac motu, et gelu quasi rigens, jaceret, urina et stercore se incio elabentibus. Post decessionem febris, subsidebat in urina paulum aliquid; affatimque is bibebat florum chamæmeli infusum, in quo soluta erant salis ammoniaci viginti grana. Horror, qui insequutus est, non minus tenuit triginta quatuor horis; quo toto spatio plane pro mortuo habitus foret, cynicus nisi, una cum sudore effusissimo, identidem intercessisset spasmus: quem tandem excepit sudorem sedimentum urinæ lateritium. Tunc sensus rediere. Semunicam corticis Peruviani extemplo dedi ex mistura cardiaca aromatica; qua epota, salvus evasit et incolumis, nullam postea passus recidivam. Haud forsitan abs re fuerit notare, variolas, confluentis potissimum



mun generis, jam ante quam ipse febri-  
citare cœptus est, parvulos ejus liberos,  
numero decem, corripuisse.

§.

Donaldus Stewart, e decurionibus le-  
gionis Scoto-Britannæ de Drumlanrick,  
sub auspiciis Belgarum Fœderatorum mi-  
litantis, febre tertiana, tempore autumnali  
anni M,DCC,L, graviter laborabat. Pri-  
mum emetica, posthæc cortex Peruvianus  
exhibitus est; neutiquam inclinante morbo.  
Post tres menses, Londinum a decurione  
ventum est; ubi febris, ita uti novas ex  
nova cœli temperie consequuta vires, in  
dies ingravescebat, et, pluribus numeratis  
accessionibus, in quartanam desiit. Pulvis  
Cornachini nullum adtulit levamen; neque  
haustus Deckersianus, vel tantillum, fri-  
gus minuebat. Quoniam vertendum? Ex-  
perientia magistra edoctus, illam in-  
stitui hujusce miserrimi curationem, quæ,  
sancte possum adjurare, nunquam me



falsum habuerat, dum in Belgio Hispanico medicinam facerem, inter prætorianos sacræ majestatis Britannicæ anno M,DCC,XLVIII: i. e. Sanguine prius missio, nitrata in emulsione præbui, cumque his una sal ammoniacum specie e contrayerva commistum. Lenior inde insequens paroxysmus: minus erat frigoris, minus quoque caloris ac febris. Ex sanguinis autem inflammatione et visciditate indicia arripui venæ iterum secandæ, et in usu eorum, quæ supra scripta sunt, permanendi. Nec frustra fui; arguebat enim proximæ accessionis magnopere deminuta vis, recte ea non prætermissa fuisse indicia. Imperavi, ut continuaretur usus emulsionis; neque post unquam rediit febris.

Hanc medendi rationem feni medico apud Eÿndhoven acceptam refero; qui, Baronis Van Swieten sub Boërhavio Hippocrate Batavo condiscipulus, mihi olim religiosissime adseveravit, lanceolam et nitrum,

in



in regionum illarum palustrum intermit-  
tentibus, singula perficere atque absolvere.

§.

Mulier quædam Austin, in Rockingham  
degens, quartana legitima per biennium  
erat conflictata; multis sine effectu devo-  
ratis medicamentorum potionibus. In  
hecticam morbus degeneravit. Ibi tum  
ad lac asininum se recipiens, cito con-  
valuit, pristinusque corporis habitus resti-  
tutus est.

§.

Ægros tres vel quatuor, quibus colicus  
dolor periodicus, cum febre, vomitu, et  
coccinei quasi coloris sedimento in urina,  
illico a cortice Peruviano adsumpto novi  
fanari; quum cetera omnia qualiacunque  
ne hilum quidem promovissent. Idem et  
animadverterat Fernelius.

FLUOR

## FLUOR ALBUS.

**H**OC morbo detentas feminas biduo vidi vel triduo liberari, immixtis in vulvam Calomel. drachm. i, Aquæ calc. unc. ii, Aquæ fontan. unc. iv, adjecta gum. Arab. drachm. i. Id, inquam, vidi, quum pessimi coloris humor proflueret; intus ante omnibus, unde aliquid sperandum, inutiliter datis.

Purgantia et Mercurialia non semper juvant. Ex usu semper cicuta et cortex Peruvianus.

Mulier quædam Charity, quum esset annorum triginta, eo usque in hoc malum incurrerat, ut singulis quibusque viginti quatuor horis tantum e naturalibus exstillaret materiæ, quantum matellam impleret. Ejus quoque rei ipsemet testis fui oculatus. E tanto profluvio cibi appetentia prorsus prostrata, viresque adtritæ sunt.



sunt. Haustum e decocto florum roris marini, cum laudano, et succino præparato, singulis noctibus sumpsit; et mane quotidie per hebdomadem bolum devoravit, ex rhabarbaro, succino præparato, et stillatio florum chamæmeli oleo confectum. Tum deinde continuato usu electarii e visco querno cum albo crudo ex ovis, infusumque roris marini et millefolii per paucas hebdomadas potando, expedita est.

Plurimum profeci hujusce medicamenti ope; cujus si externa tantummodo spectetur facies, vix auguratus fueris in illo aliquid inesse boni.

Exitu nonnunquam prosperrimo in jentaculum imperavi cerevisiam Londinensem Porter, item cerevisiam generosam Brunsvicenssem, et cum modico panis cibarii frusto veterem provinciæ Cestrensis caseum, qui ceteris omnibus palmam facile præripit.

## FLUXUS MENSTRUUS.

**M**ulieri cuidam honestæ, in St. James's-place, a frigore suscepto suppressa sunt menstrua. Nunquam illa tali affectu antea laboraverat. Cachectica evasit. Variis, quibus sollicitaretur uterus, citra effectum administratis, aperto demum sub utroque genu fonticulo, simulque etiam in brachio sinistro, sublevata fuit. Etiamnum scaturiunt hi fonticuli (Sept. M,DCC,LI) per trium annorum spatium; quo temporis tractu ad periodos solennes, et ubere satis copia, profluxit sanguis.

§.

Virgo quædam Rhodes, apud Drayton in Rutlandia, viginti annos nata, eodem fere die in menstruis esse cœpit, quo die secaretur vena saphena. Præter hanc sanguinis cunctantis deducendi methodum, alia nulla illi unquam profuerat.

Puellam



Puellam trimulam quondam vidit frater meus, cui menses fluebant, perinde quasi jam pubesceret. Præproperæ huic fluxioni superfuit illa non ultra biennium.

#### HÆMORRHAGIA.

**C**UIdam Laſton, apud Duddington in comitatu Northamptonienſi, ſanguis fere quotidie per nares erupit. Eo nati omnes ſimiliter dolebant; filiaque ejus a majore proxima, eodem affectu extenuata, diem ſuum obiit. Hujusmodi raro dantur exempla.

— Hay, tertię cohortis prætorianę tympaniſta, e quamvis levi plaga, ex ipſa proſecto aciculę punctura, ſanguinem ita fundere ſolitus eſt, ut ſæpius periclitaretur vita. Styptica qualiacunque pro nihilo erant. Ultro ſemper ceſſavit profluvium. Quum leviter is quondam in muſculo gaſtrocnemio vulneraretur, tanta repente inceſſit hæmorrhagia, ut interſtitiis

ubique musculorum se sanguis ingereret. Iſtam omnino refrænavi hæmorrhagiam, dilatando in novem uſque digitos quod acceperat vulnus ; id optime conſulentibus Davide Middleton, Cæſare Hawkins, Joanne Clephan, aliisque noſocomii Sancti Georgii chirurgis ac medicis.

Iteratæ potiones falis cathartici amari Epſomenſis plus ſanguini ſiſtendo confeſerunt quam alia quævis laudatiſſima adſtringentia. Hoc debeo viro præclaro Frederico Hoffman, omnibus, quibus cara ſalus humana, cariſſimo.

#### HÆMORRHOIDES.

**T**Antus eſt nonnunquam huic ægritudini dolor, tanta itidem inflammatio, tam valida denique pulſatio, ut vehementiſſima illinc oriantur febris ſymptomata, delirium ſcilicet, &c. ; nihil ad ea amolienda valentibus, vel fotu, vel ſanguinis detractiōe, vel hirudinibus adfixis,



adfixis, vel cataplasmatibus, vel leni purgatione, vel etiam prona corporis positura. Sub quibus casibus, nulla apostematis futuri ratione habita, venas hæmorrhoidales latius aperio. Qui extrahitur sanguis, fere est concretus. Semel tantum mihi contigit emittere rubicundum.

Medicinam hanc expertus in amico quodam quadragenario, in altero sexagenario, in juvene viginti annorum, in centurione triginta sex annos habente, necnon et in alio imprimis dilectissimo, præsentaneum omnibus remedium inveni; nec eorum quisquam valetudinis passus est recursum. Coaluerunt aperturæ intra diem octavum aut decimum.

Per-suasum habeo, plurimas sic posse fistulas præcaveri, si tempestive satis in eam curam incumberent medentes. Melius certe res verterit, modo ne demittatur specillum in vulnus, neu penicillo aliquo idem impleatur.

## HYDROPS.

**M**ILES tertiæ cohortis prætorianæ, nomine Sims, ex febre intermittente autumnali in hydropem deciderat anno M,DCC,LIX. Gravabant pariter leucophlegmatia et ascites. Pulverem, cujus subjicitur confectio, exhibui, unde largus est elicited sudor; eodemque intra triduum ter repetito, is exinanitus est. Ut vero quam maturrime gangrenæ occurreretur, cujus jam signa in cruribus manifesta nimis se ostendebant, necesse judicavi corticem Peruvianum cum vino interdium administrare; vespere autem pulverem præstare, ne aqua renascente suffocaretur. Interjecto tempore, reversa est febris, in quotidianæ formam mutata; cruribus quidem sub noctem tumentibus, at nulla alia remanente hydropis nota. Per quatuor continuos



tinuos dies dedi mane semunciam cremoris tartari; quæ, iusto vehementius purgans, copiosam citabat diuresin. Suapte sponte febris evanuit; et regimine roborante redintegratus est æger. Sequitur formula pulveris;

℞. Pulv. scillæ arid. a gr. x ad xv.

Piper. nigr.

Sal. nitr.

singulorum gr. x.

Pulv. rad. ipecacoan. gr. v.

Op. pur. gr. ii. vel duo cum semiss.

Cum syrup. althææ, vel melle, formentur in pilulas, quæ habeant singulæ quinque grana, h. s. in lecto sumend. ex cochleari aquæ menthæ, vel spiritus vini Gallici.

Nimia est sæpenumero hæc proportio; ut quæ tormina pluribus arcessat, et validius purget. Sin autem cutis renesve medicinam sentiunt, facili ea negotio in stomacho retinetur. Pulvis utrumne diureticus nuncupandus sit, an diaphoreticus, plane nequeo statuere; quum non satis constet

constet per urinam plus polleat, an per sudorem. Circa effectus, quam proxime accedit ad pulverem sudorificum celebris nuper empirici Joannis Ward.

Miles alter ejusdem cohortis, ex his qui apud nostrates *Grenadiers* nominantur, leucophlegmatia per universum corpus tenebatur. Nulla præcesserat febris intermittens. Paucissima huic urina ; impeditissima respiratio. A supra dicto bis sumpto pulvere, totus undique sudore diffluebat, et urinam trium sextariorum mensura quotidie reddebat, usque donec siccatus fuerit. Viribus hoc pacto fractis, ad vicum Hampstead amandatus, ocius convaluit.

Eodem pulvere restrictius exhibito, et hydropem abdominis, et anasarcam, aliquoties sustuli.

§.

Bis sequenti medicamento aquam in hydropse ascite evocavi, viginti quatuor horarum spatio. Brevis ea sane molestiæ inter-



intercapedo ; mox enim redundante humore periit vis medicamenti.

R. Gum. ammon. drachm. i. solut. in aqua puleg.  
unc. v.

Oxymel. scillitic. drachm. cum semiss.

Sal. ammon. crud. drachm. cum semiss.  
nitr. drachm. i.

Misce. Sumat cochlearia duo quarta quaque hora.

§.

Puer quidam Delaval, annorum fere novem, ascite liberatus est pilulis sequentibus, superbibendo animæ rhabarbari cochlearium. Vide Wedelii Amœnitates Materiæ Medicæ ; opus nocturna diurna manu versandum ab omnibus materiæ medicæ vere amantibus.

R. Pulv. gum. myrrh.  
ammon.

singulorum scrup. ii.

Extract. flor. chamæmel. drachm. i.

Ol. still. flor. chamæmel. gutt. x.

Elix. alo. q. f.

F. pilulæ, quæ habeant singulæ quinque grana.  
Sumantur tres bis die.

Pessime

Pessime habuerat hic puerulus per sex menses; aliaque ex alia methodus, qua in integrum restitueretur, frustra erat tentata. Jussi ut equo quotidie, quum per cœlum liceret, veheretur. Octantem quoque cerevisiæ Londinensis, cum vetusto provinciæ Cestrensis caseo, panisque cibarii frusto, in cœnam concessi.

## §.

Contra asciten, siue adest leucophlegmatia, siue non adest, efficacius præstat auxilium compositio sequens quam alia ulla mihi hucusque aut nota aut excogitata;

R. Cremor. tart. drachm. vi.

Pulv. rad. rhabarb.

Spec. aromat.

singulorum drachm. i.

Oxymel. scillitic. q. s.

F. confectio tenuior; cujus fumatur cochleare parvulum ter quaterve intra viginti quatuor horas, ita ut alvus ad tres vel quatuor vices soluta respondeat.

Gulielmus



Gulielmus Thomson in Leicester-square  
 ascite cruribusque tumefactis ægrotabat.  
 Multa per integras tres hebdomadas ex-  
 pertus sum remedia; nullo fructu. Ac-  
 citus est Joannes Ward: cujus pulvis su-  
 dorificus quum neque sudori neque urinæ  
 promovendæ quidquam conferret, idem  
 ille pilula sua purgationem instituit. Ne-  
 que id felicius. Deinde dedit e guttis  
 quas diureticas nuncupavit; quæ, quan-  
 tum ex gustu conjectare licuit, nihil aliud  
 mihi visæ sunt quam lixivium vulgare,  
 cui, populum concinnius fallendi gratia,  
 color arte immutatus fuerat. Harum de-  
 cem, quindecim, viginti, quadraginta,  
 etiam ad octoginta, diei unius spatio in  
 herbarum infusione sorbebantur, citra ulla  
 etiamnum sanitatis redituræ signa. Ex-  
 eunte tandem tertia hebdomade, res in  
 melius mutata. Urinæ plus plusque in  
 dies profluxit; in pristinumque restitutus

est æger diebus circiter quatuordecim, ex quo primum occepisset diuresis. Prospera duobus tribusve annis usus valetudine, morbo demum acuto ruri correptus, quod naturæ debuerat persolvit. Accepi, perisse illum jecinoris inflammatione.

Ex illo tempore adhibui eodem plane modo lixivium tartari, vel lixivium saponarium, adjecta elixiris aloes, vel extracti rhabarbari aut chamæmeli, octava parte, pluribus in casibus, ubi crura fuerint intentata, ac venter ita intumuisse, ut, si leviter manu pulsaretur, mota intus aqua facile sentiri posset; copiosamque inde diuresin citando multos explicui.

Joannes Ward guttis diureticis sæpe usus est in hydrope, exitu secundo. Nunquam mihi evenit, nisi in casu supra posito, earum rationem cognoscere.

Multa sunt hydropis exempla cum facie decolore ineuntis. Ibi parata ex rhabarbaro cum salibus alkalinis ac diureticis  
quam



quam citissime sanant; maximeque si ex fortioribus amararum radicum, herbarum, et florum infusis, administrentur.

## §.

Militem tertiæ cohortis prætorianæ ex hydrope pectoris ad salutem reduxi, tribus aridæ scillæ et decem rhabarbari granis, cum scrupulo theriacæ Andromachi, in bolum coactis, perque decem aut duodecim continuas noctes hora somni devoratis. Hinc mota est potenter urina.

Cavendum erit, ne temere hic morbus cum asthmate confundatur. Diagnostica apud Baglivium invenias.

Quinque talium hydropicorum, quos omnes ad signa Bagliviana nutrieram, aperui cadavera. In singulorum thorace frequens est repertus humor. Quæritur, an istiusmodi in casibus e cavo pectoris emitti oporteat aqua. Lingua, ab extima parte ad imas usque radices, fere nigra est, vel cum livore quodam rubicunda. Adfunt

insuper strangulationis signa minime temnenda.

Paracentesin bis feci in pectore, præsentibus anatomicorum principe Gulielmo Hunter et aliis. E laborantium uno ingens prodiit materiæ purulentæ vis; ex altero genus quoddam feri viscidum. Uterque supervixit operationi sex hebdomadas; sed fato demum functi sunt, plus passi ex aere frigido ingrediente ac regrediente, quam vel a febre, vel a statu depresso. Cui, serum emiseram viscidum, illi viginti quatuor horarum spatio conciderunt venæ a centum triginta pulsibus ad septuaginta, vel infra, ibique ad vitæ metam perstiterunt.

§.

Equiso quidam Thorpe, quinquagenarius, poculis largioribus indulgendo hydropicus juxta et asthmaticus evasit. Hisce malis per complures menses colluctatus est; facie livida, cibi cupiditate prorsus nulla,



nulla, Autumnum versus mirum in modum turgescibat. Cruribus oborta sunt ulcuscula, tanto cum pruritu, ut nunquam non scabendo non posset temperare. Hinc plurimus effluxit ichor, qui summos etiam calceos exsuperavit. Tum evanuerunt singula morbi symptomata; incessit rabies edendi; salusque amissa brevi recuperata est.

## §.

E fide dignissimis comperto, in India Orientali speciem esse hydropis, quæ illito unguento mercuriali concedit; in animum induxi, idem hic fortasse terrarum fieri posse. Expertus sum in milite; expertus in remige. Neque huic, neque illi, minima erat plagæ venereæ vel præsentis, vel præteritæ, nota. Fefellit utrobique consilium. Cessit ex sententia in milite alio Fullingham, cui jussi perungi femora: at venus illi immunda morbum conciliaverat,

Hy-

Hydropis species quædam est, cui obnoxius uterque sexus circa annum ætatis quadragesimum vel quinquagesimum, quæque fugari potest non nisi sanguine detracto, victu tenui, medicamentisque antiphlogisticis. Multos vidi hoc genere affectos. Quum, ad celerius subvenendum, sanguinis missionem hortatus sum, me mirati fere sunt adstantes tanquam rem inimicam præcipientem. Sed id commode respondere experimenta plura testantur. Inter paucos qui hujus curationis meminerunt scriptores, eminet Thomas Lawrence, cujus elegans volvatur Disputatio Medica de Hydrope.



## I N S A N I A.

**I**N hac mentis nostræ atque rationis tam lugenda ruina, primus omnium (quantum scio) Fredericus Muzellius tartari solubilis usum scriptis commendavit.

Hujus tartari beneficio, ad auctoris præceptum exhibiti, tres tertiæ cohortis prætorianæ milites ad sanitatem revocati sunt. Priori supervenerat infania, a frigore post illitum liberalius mercurium admissio; alteri, a gravibus commilitonis cujusdam ictibus, et accepta contumelia. Qua de causa insanire crederetur tertius, nescitur. Singuli furebant, canebant, diras fundebant, &c. sine febre.

§.

Ante editas Muzellii observationes, homo quidam e dica diutius tracta in maniam

nam actus, sanatus erat a Gulielmo Battie, largis datis tartari regenerati vel salis diuretici potionibus, interpositis quotidie ex intervallo potionibus eorundem parvis. Adhuc tractatum ejus ingeniosissimum.

Ab eodem vidi quoque mulierem honestam simili modo sanari, addito gummi sagapeno, &c.

Et aliam quoque contigit cernere ab eodem restitui, ejusdem salis ope, et solutione gummi ammoniaci cochleatim subinde exhibita. Ex traduce erat hæc infania, et decurso biennio rediit, sed levius.

Præter eos quos memoravi, vidi ad triginta alios eadem medicina ad sanam omnino mentem reduci.

Talium fere medicamentorum usu, in melancholia et mania pellenda, vir ille, arte sua insignis, cum maxima fama maximas opes conquirit.

Interfui



§.

Interfui quondam, ubi mulier, a partu infaniens, decocto corticis Peruviani et vino compos fui facta est.

Præsens quoque vidi, quum infania, quæ febrem autumnalem irregularem exceperat, eodem cortice solo ex toto tolleretur. Vide quæ super re tali scripta reliquit optimus Sydenhamus.

#### LACTIS UTILITAS.

**G**Eorgius Burton Uppinghamiensis, annos circiter duodecim natus, pro ætate habitior, et, nisi quod negotium ei lumbrici nonnunquam facefferent, bona satis fruens valetudine, acuta calebat febre, cum pulsante quodam circa scapulas dolore. Mansit per tres hebdomadas illud symptoma; quibus elapsis, invasit surditas. Sudores quoque nocturni sic premebant, ut tanquam colliquefactus adolescentulus

I

jaceret.

jaceret. Medicamenta imperata sunt perquam idonea ; quæ tamen ut fumeret, illi nullo modo persuaderi potuit. Hortante fratre meo, e vicinia quæsitæ est quæ lactabat nutricula. Isthæc, mammam distentam præbendo, omnem medici opem brevi supervacaneam reddidit.

Aliud lactis utilitatis exemplum supra invenias, p. 37.

#### L I P P I T U D O.

**F**UMO tabaci ducto depulsa primum est, idque celerrime, lippitudo juvenis Uppinghamiensis Hill. Ab illo tempore, si per pauculos etiam dies is tubulo parum diligenter operatus erat, continuo lippiebat. Rursus arrepto tubulo, quum primum ex fumo ducto sputum edi incepisset, certo is facile et mature revaluit.



## LUES VENEREA.

**V**ARIIS signis cognoscitur nefanda hæc lupanarium propago: E cancris in glande, in præputio, et nonnunquam ad ipsas radices penis; e bubonibus; e tonsillarum, aut palati, eique junctarum partium, exulceratione; e pustulis per corpus fufis, inprimis ex iis quæ in fronte emicant, vel ad loca corporis maxime pilosa; e doloribus nocturnis, supraque ossa et circa articulos tuberculis duris; ex verrucis in glande vel præputio; e rhagadibus ad anum; ex ossibus palati aut nasi putrescentibus; ex ipsius denique calvariæ, nec raro tibiæ, ossiumve cæterorum, carie.

Hoc symptomatum tam terrificum agmen facillime in fugam vertitur, nulla sui colligendi facultate data, si singulis nocti-

bus duo unguenti mercurialis scrupuli feminibus per semihoram ante focum illinantur. Id autem ita fieri debebit, ut a pudendis et inguinibus, præcipue ubi jam adfunt ulcera vel bubones, omnimodo abstinenceatur. Quamdiu non ulla exulceratione læduntur gingivæ, sedulo infricare perstandum est, donicum a viginti ad quadraginta drachmas absumptæ fuerint. Sub primis quindecim inunctionibus drachma corticis Peruviani quotidie devoranda est, cum oleribus abunde, aurantiis, aliisque tempestatis locive fructibus ; at vero alteris quindecim inunctionibus in dies bibatur sextarius decocti farsaparillæ, qui sextarius ternas habeat ejus radicis uncias. Quum salivæ per argentum vivum proritatio non omnino sit necessaria, eam sæpius effugere licet per diætam modo propositam, per crebro mutatum aerem vel loca, vinique interioris notæ usu moderato.

Hæc



Hæc breviter dicta sunt, quæ uberius et fusius in eo libello differuntur, quem olim lingua vernacula de morbo hoc perniciosissimo separatim feci. Ad illud volumen, si quid hic deesse videtur, lectorem delego.

### LUMBRICI.

**A**NNO M,DCC,XLIII, mulier quædam Sharmont, Uppinghamiæ degens, quarto post puerperium die sævissimis correpta est vomitionibus. Immodicus his supervenit lochiorum fluxus. Hinc tanta virium jactura, pulsusque adeo celer, exilis, atque inæqualis, ut in summo discrimine constitueretur ægra. Septimo die lumbricum illa teretem rejecit, aliosque duos post paulo demisit. Quinque pulveris stanni Cornubiensis drachmæ ex theriaca propinatæ sunt, eo quem posuit modo jam ante laudatus (p. 7.) magister

gister meus Carolus Alston. Prima hac exhibitione fræni vomitionibus injecti sunt, ad earum coercionem inutilibus antea tam opiatibus quam anti-emeticiis. Duabus omnino pulveris ejusdem consumptis unciiis, vomere desitum est; eodemque temporis momento coercitus quoque est lochiorum fluxus.

Mulierem aliam White, apud Wing Rutlandiæ vicum, quum quartum jam mensem ventrem ferret, ciborum quos ceperat omnium vomitus infestabat. Sanguis iterum iterumque missus, purgantia, anti-emetica cujusque generis, acida, quæque iis contraria sunt, eam nihil juvabant, nisi quod linguæ bubulæ infumatæ exiguum quiddam a stomacho quandoque retineri posset. Hoc modo tribus se habuit hebdomadis. Incidit tandem suspicio lumbricis eam exerceri; ideoque pulvis stanni Cornubiensis exhibitus est. Cujus post devoratam non amplius semunciam, ad salutem



salutem pervenit; et, actis demum mensibus, onus suum maturum, perfcitum puerum, in gremium læti patris effudit.

### MORBILLI.

**E**NIXA est quædam Skellion die Martii decimo octavo M,DCC,XLVII; nec ibant lochia. Sexto a partu die ostenderunt se morbilli, cum symptomatis præter solitum vehementibus in illa aeris constitutione. Spiritus difficultas ad strangulationem fere. Extractus est e brachio sanguis; unde mirum in modum huic symptomati occursum est. Septimo a partu die (secundo vero ab eruptione) morbilli penitus evanuerunt, nec denuo redierunt. Nono die integritas. Decimo quarto res fecus cessere: et dolebat caput, et spiritus iterum urgebat. Venam saphenam ad uncias quinque fluere feci. Hinc omnia delinita; at lochia adhuc restricta.

Postridie

Postridie sale cathartico amaro et rhabarbaro purgatum est. Inter purgandum, feruntur debito more lochia; et omni malo mulier feliciter expedita est.

§.

Ex eo quod ægrotantibus e variolis auræ liberioris usus prosperrime vertit, opinati sunt haud pauci, et eos quoque, qui morbillis laborant, recte, dum prodeunt maculæ, sub dio versari. Falluntur hi valde. Id enim gravius multo periculum efficit: immo vero mihi videtur mortem sæpius intulisse. Etiam quum hoc curandi genere utentibus maxime feliciter res cesserit, iteratæ sanguinis detractiones, regimenque asperrimum antiphlogisticum pluribus mensibus continuatum, ægros male mulctatos ab interitu vix vindicant. Contra ea, ego semper commoneo, ut in lectulo se contineant qui mihi traditi sunt; hisque singula interdico, quibus impediri minimum queat macularum eruptio.

P A R O-



## PARONYCHIA.

**A** Secto nimis introrsum ungue, vel clavo pedis, ortam paronychiam nunquam vidi, nisi aliquo intus in sanguine substante vitio. Neque unquam impositum aliquid ex iis quæ digerunt, vel ficcant, prodesse novi, ante iterum tertioque factam purgationem. Hinc subitanea fere semper ac melior rerum inducitur facies. Ubi semel inflammatio sublata est, si curiose satis excisus fuerit unguis, adhibitum linum, balsami traumatici gutta imbutum, binis ternisve diebus prorsus medebitur. At si dolor inde concitetur, vel nova succrescat inflammatio, tum demum usurpanda sunt digerentia, locusque calidis curationibus tantisper fovendus, dum balsami vim ficcantem ferendo par sit. Quo facto, mo-

mento quasi horæ, finitur malum. Pulvis jalappæ cum alterantibus ex mercurio, vel iis nullis, humores præ omnibus corrigit ac purgat.

#### PULPA COLOCYNTHIDIS.

**F**EMINA quædam Syftmey, apud Beesbrooke Rutlandiæ vicum, annos nata duo et viginti, hausto pulpæ colocynthidis ex cerevisia infuso, verminata et purgata est vehementissime. Ad annum quinquagesimum tertium provecta, dolore adhuc intestinorum, necnon assidua in regione umbilicali pulsatione, eo usque torquebatur, ut prostrato in ventrem corpore cubare ac dormire necesse haberet. Anno ætatis tricesimo octavo, semper quum menstrua ferrentur, quæ justis sane temporibus, at exigua copia redibant, magnam vim sanguinis ore reddiderat; pau-



paucisque post diebus, cruenta, concreta, graveolentia rejecit. Ab anno quadragesimo octavo ad quinquagesimum secundum menstrua rite provenerunt. E carniū genere stomachus nihil retinere potuit. Has quidem comeſtas dolores intolerandi ac vomitiones ſequutæ ſunt. Cibi calidi, aromata, et acida, inprimis offendebant. Pergrata jura pingua, victus lacteus, ac butyrum. A medicamenti auxilii nihil. Graviffimas denique de pulpa colocynthidis querelas continui dolores continenter eliciebant.

#### R H A B A R B A R U M.

**N**ULLUS dubito, quin parata ex rhabarbaro, ni ſero nimis uſurpentur, cunctas fere infantum, æque ut ipſum ſimplici forma rhabarbarum, febres hæticas ſanaverint, ſive venter diſtenſus eſt,

sive non. Inter notiora in hunc finem comparata pharmaca nihil prius habeo quam animam rhabarbari Wedelii. Felicius tamen rem gero pulvere antihectico, cujus formulam videre est ad calcem Inquisitionis Novæ de Febribus, quam paucis retro annis vernaculo sermone conscriptam in lucem edidi.

## §.

Miles tertiæ cohortis prætorianæ e febre, ut videbatur, inflammatoria, in quartanam decidit. Quartana vicissim in hydropem abdominis et crurum degeneravit. Continuatō in decimum diem medicamento sequentis usu liberatus est;

R. Pulv. rhabarb.

Sal. tartar.

singulorum scrup. ii.

Infus. flor. chamæmel. unc. iii.

Misce. Sumat jejunus mane.

Idem



Idem pauperculæ cuidam prope Queen's-square, Westminster, supervenerat morbus a fluxu lochiorum immodico post partum difficilem ; eodemque modo sanitas restituta est, nisi quod illa ex infuso herbæ marrhubii albi, miles autem ex infuso florum chamæmelinorum, medicamentum forpserat.

Pari ratione sanavi militem senem exauctoratum, cujus valde distensus erat venter. Adficiebatur is ictero ; at nullus aquæ motus a digito contrectantis percipi potuit.

§.

Filio quinquenni tympanotribæ principis tertiæ cohortis prætorianæ intumuerat venter. Aderat et febris hæctica, qua acerbissime acceptus fuerat per multos menses. E vestigio convaluit, hausta Sydenhami rhabarbari ex cerevisia tenui infusione. Cerevisiæ tenui prætulerim vinum album aquæ admistum, quippe tardius



dius acescens, magisque stomacho gratum ac benignum.

§.

Mulieri Pridmore, apud Morcott Rutlandiæ vicum, annos habenti viginti octo, ex partu difficili, retentaque per biduum placenta, nimius erat lochiorum fluxus. Huc accedebat cachexia cum febre. Uroscopi monitu corticem Peruvianum liberalius devoravit. Alvi supervenit profluvium, itemque abdomen tumefactum; unde vires adeo imminutæ, ut e lecto surgendi facultas non daretur. Invenit eam frater meus et hydrope et ventris fluore laborantem. Jussit viginti quinque rhabarbari grana, cum oleo cinnamomi et menthæ in bolum coacta, altero quoque mane devorari, vespere autem opiatum ex aqua cinnamomi exhiberi. Sub finem tertiæ hebdomadis, omnia in tuto posita sunt. Ad vires collapsas refarciendas vinum datum est diureticum, cum pilulis e  
limatura



limatura ferri non rubiginosi, simul et amarorum extractis. Insignis qui torquebat in intestinis dolor ex toto sublatus est usu balsami Peruviani, saccharo, sicut præcipit Sydenhamus, albidissimo instillati.

### R H E U M A T I S M U S.

**E** Nimio cœli ipsius humore, e dapibus lautioribus, ex cerevisiarum spissitudine, et incuria de amictu plane singulari, incolæ meridionalium hujusce insulæ partium rheumatismo super alios obnoxii sunt. Qui rheumatismus aliam atque aliam postulat curationem, pro statu corporis, quum morbus id primum prehenderit.

In genere inflammatorio, cui febris adest cum arteriarum pulsu duro atque æquali, ubi dempto sanguini coriaceum est crassamentum, assiduisque doloribus

vexatur

vexatur totum corpus, membra inprimis, quæ tumore sæpius correpta neque se flectere, neque omnino flecti possunt; sanguinis missio, cum diluentibus, ac regimine antiphlogistico asperiore, trium fere hebdomadarum spatio incolumitatem præstant, maximeque si inter principia ægrum male habuerint universi corporis dolores.

In genere bilioso, nec durus est pulsus, nec æqualis; dolores non constant; nec tumor aliquis membra corripit. Adversus hoc genus, tum propria experientia, tum ex aliorum observatis compertum habeo, sales neutros cum rhabarbaro inter optima esse præsidia; bilem enim, nisi si quod peccat acrimoniam appellare mavis (non laboro de nomine) præ omnibus potenter ac celeriter ex habitu educunt.

Est et aliud genus, quod spasmodicum cognominarem, quo scilicet pars quædam corporis



corporis convellitur, arctiusque contrahitur; dorsum puta, cervix, aut humerus. Et verius id quidem statis temporibus reverti dici potest, quam unum atque eundem tenorem fervare. Perraro sanguis crassamento coriaceo obtegatur: pulsus parum turbatur. Pendet præcipue curatio ab opiatīs rite administratis, ab idoneo pulveris valerianæ silvestris usu, vel ab apte adpositis vesicatoriis.

Quartum porro est genus, fonticulis follicis amovendum. Quibus hoc genere ægrotantibus fonticuli, quacunque de causa antea facti, post exaruerint, iis tandem necesse est ut denuo aperiantur, siquidem nullo alio pacto sit sanitas recuperanda.

Supervacaneum forsan videbitur meminisse, dolores a lue venerea provenientes sæpenumero pro meris rheumaticis falso haberi. Tales inuncto mercurio, in modum tamen quem ultra progredi fas non

est, vel haustis fortibus radicis sarsaparillæ decoctis, certo, tuto, cito pelluntur.

Arthriticam quandam rheumatismi speciem videre plus semel contigit, cujus de natura aut curatione me prorsus nescire confiteor; doletque, miserorum laborantium ergo, alios cernere de arte medica optime merentes juxta mecum ignorare. In hoc tamen ipso, sicuti et in genere inflammatorio, post alia multa inani opera experta, plurimum profeci hac compositione;

R. Aquæ fontan. unc. vi.

Sal. nitr. drachm. i.

Tinct. antimon. acris (Pharmacop.  
Parisi.) drachm. i.

Spec. contrayerv. drachm. semiss.

Sacchar. alb. drachm. ii.

Misce. Pars quarta sumatur sexta quaque  
hora.

Adolescentula



Adolescentula quædam, neptis ministræ primariæ honoratissimi Comitis de Gower, ex rheumatismo, quo per sex menses laboraverat, ad salutem reducta est saccharo potissimum aconiti Stoërckiano; idque post optima nostrorum consilia irrita sæpius atque elusa. Eodem saccharo ex intervallis parva copia exhibito sanavi Thomam Hayes apud Richmond-park Lodge, cui medicamenta nulla unquam profuerant. Effusissime sudavit uterque æger.

Kal. Julii 1782.

DE Catarrho contagioso, qui, dum hæc super rheumatismo typis mando, levior esse incepit, pauca quædam in transcurso sunt attingenda.

Menfe Maio, et ad finem usque Junii, in hac urbe, in agris, et per omnes fere boreales Europæ populos, febris sæviebat catarrhalis; quo morbo nunquam vidi magis epidemice grassantem. Non enim illa optimatibus, neque infimæ fortis plebi pepercit, neque qui-



bus magis erant validæ fibræ, neque quibus infirmiores. Quare hunc occupaverit, illum intactum reliquerit, tot licet inter ægros per hebdomadas quinque versatus, nondum didici. Ii certe quorum maxime purum videbatur temperamentum, quibusque humores haud ita facile ferveſcebant, malo minimum opportuni erant. Ex convictu aut ſocietate de corpore in corpus fluxiſſe non videtur.

Qui ex recentioribus longe luculentiffime de morbis epidemicis diſſeruit, medicus præclarus Joannes Huxham, inter inſignia alia innumera, verbis utitur ſequentibus, quæ ideo exſcribo, quia ad hujusmodi malorum initium, et cauſam, et ingenium explicandum, cum maxime faciunt :

“ Ex humida valde et minus elæſtica aeris  
 “ conſtitutione,” inquit ille, “ ſanguinis len-  
 “ tor nimius producitur facile; unde circu-  
 “ latio per vaſa minima haud expedita, per  
 “ majora autem debito rapidior, eaque aucta  
 “ plurimum a ſuſcepto frigore, perſpirabile  
 “ ſubito reprimente. Unde paroxyſmus fe-  
 “ quitur febriculofus; qui tamen brevi fa-  
 “ ceſſit, amotis nimirum repagulis, et con-  
 “ ſequenti ſudore, niſi aut ſanguis fit lentus  
 “ valde aut viſcidus: tunc enim vel putrida  
 “ ac



“ ac lenta febris, vel ardens ac vehemens,  
 “ subsequitur; prout nempe fibrarum tonus,  
 “ magis minusve elasticus, et status humo-  
 “ rum disposuerit.” *Observ. de Aere et Mor-*  
*bis Epidem. p. 20.*

Atque ita quidem hac tempestate res se habuit. Primas ingruentis mali significationes dederunt, susceptum quasi frigus, stertuta, narium fluo, rauco, cum tussi, sputo, spiritibusque animalibus dictis plus minus affectis.

Ex tot hominum millibus, per regiones disjunctissimas simul correptis, satis constat, halitum quendam, seu auram malignam, coeli tractu corrupto, mortalium corporibus incubuisse. Unde horrores extiterunt, vagique per membra in aliis, et in aliis per corpus universum dolores, atrox insuper cephalalgia, necnon in plurimis animi defectus, ab eo haud multum discrepans, qui putridi generis febres antecedit et comitatur; quæ fere symptomata una cum tussi dura morbi curriculum absolverunt. Nec is sane diutinus erat, si modo tussim excipias, atque animi defectum, quæ, ceteris submotis symptomatis, multos adhuc infestos habebant. Major namque pars ægrotorum, post calidas hora somni et diluentes epotas potiones, copiosius



piofius infudando, brevi confirmati funt ; quod et nonnullis contigit fine his.


Morbus, quantum ad vim ejus fpectat, fudorem Anglicum referebat, fimilique ratione folutus eft intra triginta fex, vel octo et quadraginta horas. Non omnibus tamen æque feliciter res vertit. Ubi enim aliæ quævis caufæ vel fanguinem in nonnullis æquo fpiffiorem reddiderant (in iis præfertim vegetis, qui mediam excefferant ætatem) vel fuccos in aliis putridos effecerant ; ibi vitium in talibus conceptum mephitica aeris conftitutione in motum cieri videbatur, inque peripneumonias, phrenefin, aut febres putridas erupit. Horum ægrorum alteri totas regiminis antiphlogiftici vires defiderabant, cum fanguinis detractiōe, falibus neutris, diluentibus, fummaque abftinentia ; alteri autem methodum antifepticam rigidiffimam, vel medium quoddam iter, quo tamen itinere maxima nonnunquam inflammationis fymptomata protinus in putredinem confederunt.


Mali vehementiam omnem perpeffus, tam de his loquor quæ ipfemet fenfi, quam quæ oculis fidelibus fubjiciebantur. Sanitatem aliquot ante hebdomadis lætus recepi,



Varians Columnae Mercurialis altitudo.  
mense *MAYO* 1782;

Ex Automato Barometrico ingeniosissimi viri *ALEX.<sup>R</sup> CUMMING.*







eo lætior, quod cives undique exultantes cernerem propter pulchram illam et spectabilem de Gallis reportatam victoriam navalem, Rodnæo duce, quem nulla tacebunt secula, cujus ad lectum, iniqua valetudine conflictantis, noctesque diesque sæpenumero adstiti.

Vos medici clari Petropolitani, Berolinenses, et Vindebonenses, apud quos caput suum primum extulit hæc contagio, historiam ejus, eique regimen idoneum impertimini, ut mutuis in unum collatis observationibus, eandem, si denuo redeat, minus formidolosam reddamus; ex ea etenim, in partibus insulæ nostræ demissis et uliginosis, plurimi occubuerunt. Illud interim lætandum est, eam nos verno tempore invasisse, quum magis ad inflammationem inclinarent corporum succi quam ad putrorem.

SALIU

## SALIUM USUS INTERNUS.

**A**RTIS chemicæ peritis historiam corporum salinorum permittimus, ut et illorum divisionem in simplicia et composita, acida et alkalina. Ad eosdem relegamus acidorum subdivisiones, quas vocant, in vitriolica, nitrosa, muriatica, et vegetabilia; alkalinorum rursus in fixa (sive vegetabilia, sive fossilia) et in volatilia. Penes eosdem itidem esto salia neutra definire, quibus neque acidi infit neque alkali vis, de ceterisque omnibus speciebus, in quas salia distribuere placuit, subtiliter commentari.

Mihi satis est summatim observare, substantias salinas locum principem tenere in omnium fere morborum sanatione, tam acutorum quam longorum; quique illas nesciat utrobique administrare, hunc ex ordine medico esse movendum.

Neque



Neque solus ego de salibus sic censeo. Scribit Fredericus Hoffman, chemicus illustris, idemque medicus experientissimus, ex omnibus medicamentorum generibus, varia etiam arte conquisitis, nulla dari usui medico, in morbis tam aver- tendis quam tollendis, singulariter accommodata, quæ cum salibus comparari possint; neque ex hisce omnibus ulla esse putat, a quibus major virtus, salus, et tutior medendi ratio, peti et expectari possint, quam ab iis quæ mediæ indolis sunt, et Neutra vocantur, adeo ut omnis fere, quæ a medicamentis desideratur, virtus, etiam cathartica, in iis resideat. Vide ipsum De salium medicorum eccellente in medendo virtute. His subjicere libet, talia, siquid aliud in rerum natura, vitale illud quæsitum alkahestum continere.

Haud inficior, salinis corporibus certas quasdam a medicis nostratibus et chemicis

M

concedi

concedi virtutes. Nequeo tamen quin constanter adfirmem, istiusmodi corporibus meritas suas laudes nequaquam obtigisse, utilitates eorum magnas multasque non abunde monstratas esse, neque ingenia atque discrimina explanate satis determinata.

Medicos conspicuæ alias famæ semel atque iterum vidi, qui salium neutrorum purgandi tantum respicientes vim, magno habuerunt in pretio sal Glauberi, Epsomense, vel Rupellense, posthabitis omnino sale polychresto, tartaro solubili, tartaro regenerato, vel sale diuretico Pharmacopœiæ Londinensis: quæ ipsa quotidiano prope usu comperio febres multas putridi, nonnullas inflammatorii generis, haud paucos etiam ex morbis iis qui ægros diu ac pessime habent, radicitus tollere.

Enimvero, si primæ erunt solum purgandæ viæ, aut alvus compressa fortiter solvenda



ſolvenda eſt, ſal Glauberi, Epsomeneſe, vel Rupellenſe præcipio ; ſperato tamen potiſſimum commodo pro majore vel minore ſtercorum copia. Quod ſi corpus volo ſolutum ſervare in pleuritide, peripneumonia, phrenitide, aut alia qualibet febre inflammatoria, ſal polychreſtum per ſe impero, vel nitro conjunctum, pro ratione febrilis ætus dejectionumque deſideratarum.

Si viſcidos humores, aut bilem tenacem, reſolvere animus eſt, tartaro utor ſolubili, cryſtallis ejusdem, aut cremore. Si major acceſſit putredo, uberiorque ciendus erit urinæ fluxus, ad tartarum decurro regeneratum. Si denique ſanguinis inſignem aliquam, ut in hæmorrhagiis, ebullitionem cohibere cupio, vel progredientem putredinem, nimiamve ſuccorum reſolutionem, valentius compeſcere, fit ſtatim tranſitus ad tartarum vitriolatum ex præſcripto Pharmacopœiarum.

SANGUINIS

## SANGUINIS MISSIO.

**P**hyfiologos inter et practicos diu acriterque controversum est, an ex sanguinis emissi facie certi aliquid innotescat de magis accommoda curandi ratione, sive de venis iterum necne incidendis. Hi profecto disputatores, dum theorias inter se diversissimas scriptis innumeris stabilire student, pene omnes mihi videntur facta medica aut omnino prætermisisse, aut sua ipsorum experimenta in aliud detorsisse.

In nosocomiis apud Gallos vidi quasi rivos sanguinis profundi, repetitamque toties venæ incisionem in morbis quam maxime putridis, ut ægri jam jam morituri viderentur. Ipse contra crebra detractiōe plurimos a morte eripui, ubi scilicet sanguis magnopere viscidus talem detractiōem flagitare videbatur. Animo  
autem



autem meo hisce omnibus in casibus satis semper supraque factum est, dum id agerem, quod adstantes, si non temerarium inconsultumque ducerent, saltem improbarent.

Mulier quædam Clarke in New-street Covent-garden morbo laborabat, cui signa omnia erant summæ inflammationis, nisi quod dempto sanguini, qui laxioris erat contextus, super incumberet cærulea quasi membranula. A venis iterum secandis sedulo temperavi. In febrem intermittentem malignam subito morbus conversus est, cui cortex Peruvianus remedio fuit, ex eo statim temporis puncto, quo febris indolem symptomata ostendebant.

At longe aliam ingredi visum est viam, ægrotante Ludovico Stanislao De la Rochette. Huic arteriarum erat pulsus æqualis, nec febrem celeritate, nec plethoram duritie indicans; dolor vero obscurus in sinistra parte abdominis sentiebatur. Re-  
spiratio



spiratio facilis et libera illæfos pulmones et pleuram arguebat. Extractus sanguis, summopere viscidus, crûstaque coriacea obductus, ex familiaribus ejus peritissimum chirurgum admonuit, periculum instare. Venis iterum iterumque incisis, salibus neutris, et mediocriter purgantibus sæpius administratis, anxii tandem reddimus amicis virum ingenio jucundo, varia eruditione, morumque singulari comitate insignem.

Ex sententia Bellini, sanguis mittendus est in nullo non morbo, ubi vel copia ejus minuenda est, vel velocitas augenda; vel æger est refrigerandus et humectandus; vel aliquid vasis adhærescens movendum et auferendum; vel ubi particulæ quæ sanguinem componunt, magis inter se miscendæ sunt, aut immutandæ.

Ut rem in pauca conferam, quicumque medicus jacentium lectos accedit, nescitque venæ incisæ mechanicos in laticis sanguinei



guinei texturam effectus ; aut qui temere in animum induxerit, nullas esse de curatione colligendas significationes ex crassamenti ejus et feri colore, vel ex partium tenuitate aut lentore ; is medius fidius ab omni morbo inflammatorio, ut et a plerisque putridorum curandis, in totum abstineat.

Excruciabatur hernia humorali juvenis illustris. Sanguis ad duodecimam usque vicem detractus, alimenta que vix ulla concessa, pulsus celeritatem aut durtiem haudquaquam minuebant. Incisionibus decima tertia et quarta, animo eum deficiente, febris soluta est. Per totum morbi decursum nullum passus erat spirituum languorem. Binis ternisve post annis febris putrida correptus, animumque, ut in ejusmodi morbis consuevit, despondens, ne unam transigere noctem ausus est, nisi medico propter adfidente. Convaluit sine sanguinis missione.

S O M N U S.

## S O M N U S.

**C**ONvenit inter omnes, nihil magis ad hoc usque tempus in medicina desiderari, ut submoveantur multa gravissima mala, quam somni arcessendi facultatem. Mille, ut verum fateamur, ducentis abhinc annis, ævo nempe Aretæi Cappadocis, tantum fere de hac re innotuit, quantum summis obtigerit hodiernis magistris.

Quidquid sanguinem circumeuntem nimium propellit; quidquid nervos crebrius aut fortius agit; quidquid perspirationem Sanctorianam, five noctu five diu, quam minime cohibet; quidquid flatum intestinorum gignit; quidquid denique ventriculum prægravat, vel coctionem quomodocunque impedit; ea singula, magisque multo si inter se nexa et jugata,



jugata, vigiliarum in causa sunt. Et alia sunt quædam, non satis a medicis intellecta, quæ somnum similiter prohibent.

Si adest febris; vix dicere est, quantum molestiarum, angoris, ac periculi, e vigiliis oriatur. Ubi ea est nulla; quis non vidit, quam misere spasms nervi turbentur, quamque gravia afficiant symptomata hysterica, hypochondriaca, melancholica, et maniaca, deficiente per membra placidæ quietis irrigatione?

Alibi meminimus tartari solubilis vim præclaram febrientibus somnum conciliandi, rationemque ostendimus qua sit id exhibendum. At vero præ tartaro solubili, præque omnibus adhuc repertis soporiferis, Pilulæ Stomachicæ, jam ante memoratæ, suaviter consopienti virtute præditæ sunt, ultra quam nisi expertis credere liceat.

## V A R I O L Æ.

**E**TSI variolarum naturæ nova multa hac ætate adfusa sunt lumina, unde in illis curandis, five inferendo arcessitæ sint, seu suapte sponte advenerint, nostrates tantos fecere progressus; nihilo-minus tamen parum mihi liquet, practicos ad humorum temperiem, qualis ea sit, animos satis attendere.

Neque iidem mihi magis videntur periculum præcavere, e methodo antiphlogistica vel antiseptica, si hanc aut illam plus nimio insistant, frequentius oriturum; præcipue ubi a teneris unguiculis eatenus infantes carnibus insueverunt, ut, dum ad maturitatem tendunt pustulæ, negatis his, vix vita vitalis dici queat.

Pustulis maturefcentibus, vidimus sæpe necessitatem, juxta atque utilitatem, ægro-  
tantibus



tantibus ex infitione victum indulgendi, sanctis summorum ejus generis artificum legibus quam maxime adversantem. Quandoque etiam coacti sumus sanguinem copia bene larga educere, ne ex eo nimis viscido noxa cerebro aut pulmone inferretur.

Olim quum tot ubique strages ederet funesta hæc lues, hisce talibus diligentius forsan advertebatur, quam his temporibus, quibus tota pendet curatio ab aere refrigerante et regimine antiphlogistico.

Corticem Peruvianum, vinumque rubrum Lusitanicum, gravissima sæpe amotura symptomata, res confessæ est. Reperiuntur tamen, qui ad affectus nervosos adeo natura sua feruntur, ut, nisi opiatum tollatur orgasmus seu ataxia nervorum (uti loquitur Sydenhamus) ægri nullo modo sunt leto redimendi.

Administratis opiatum mulierem quandam Rix in Stafford-row, quæ nativis variolis laborabat, ad sanitatem perduxit. Ejus-



dem foror, cui morbus arte inductus, fato ante interierat; omisso, ut opinor, opiatorum usu.

§.

Filio Joannis Drummond apud Charing-cross contagium per infitionem communicatum est; raris sparsis hinc inde pustulis. Puero moriendum erat, ni statum versus carnes edendas concessissem. Nihil maturationem promoverant cortex, vinum, aut acida; neque spiritibus animalibus opiata profuerant.

§.

E famulis meis adolescentulus, annos habens septemdecim, solita naturæ via morbo hoc tenebatur. Ut delirio atque signis peripneumonicis obviam iretur, sexies progrediente maturatione incisæ sunt venæ. Crassamentum singulis vicibus in crustam coriaceam se induebat. Sanguine licet toties dempto, pustularum maturatione minima ex parte impedita est.

VENTRICULUS.



## V E N T R I C U L U S.

**Q**Uædam Bagley, in vico Rutlandiæ  
 Manton, ætatem mediam egressa,  
 alternis quibusque per triennium hebdo-  
 madis, acerbissimo ventriculi dolore cru-  
 eiata erat; junctis vomitionibus eo usque  
 incitatis, ut neque cibum, neque potum  
 qualemcumque, vel dimidiam horæ partem  
 continere posset. Dum miseris his modis  
 plecteretur, nihil unquam alvus demisit.  
 Quæ autem rejiciebantur, singulari illa  
 proprietate donata sunt, ut factum ex  
 argento cochleare nigro colore inficerent.  
 Imperavi sexaginta guttas olei tartari per  
 deliquium ex infusione florum chamæme-  
 linorum quotidie sumendas, una cum pi-  
 lulis ex limatura ferri non rubiginosi,  
 simul et herbarum amararum extractis.  
 Hinc purgata est per primam hebdomadem  
 se-

sexies septiesve de die. Paulatim dein ita inclinavit medicamenti vis, ut tandem semel tantum in die desideret. Jamque liberata est. Elapso fere mense, priora visa sunt quasi recrudescerent symptomata, quibus finem omnino adtulit oleum tartari per deliquium ex infusione florum chamæmelinorum.

§.

Mulier alia Lee apud Farndon in comitatu Leicestriensi pertinaci quodam ventriculi acido humore pessime habita est, quem tamen submovit cortex Peruvianus. Si quando rediret, ab eodem remedio palmario actutum pulsus est.

VESICATORIA.



## V E S I C A T O R I A.

**U**BI brachium in hemiplegia potissime afficitur, vesicatorium amplum cervici, qua nervi ad brachia tenduntur, injectum, optatissime nonnunquam respondet. Hoc auxilii genere firmitatem corporis receperunt agricola Uppinghamiensis Burton, pauperculus novem annorum apud North Luffenham, aliique complures, quorum nomina festinante nimis calamo in adversaria non retuleram.

Nusquam comperi vesicatoria æque cito prodesse, atque in acutis pulmonum morbis, post commodam sanguinis missionem cruribus adposita. Convenit hoc Hippocraticæ disciplinæ: “ Quod tumores ad furas, &c.

## U N G U E N T A.

## U N G U E N T A.

**V**IX reperias unguentum in Pharmaco-  
pœia Londinenſi plagis aut ulce-  
ribus ſanandis omnimodo accommodum.

Rodit unguentum baſilicum flavum præ  
nimia acrimonia. Adde, quod durities ejus  
nervorum papillas corrugat, ac carnis pro-  
ductionem impedit.

Unguentum e gummi elemi vix mollius  
eſt textura, aut lenius quod ad effectus.

Unguentum baſilicum nigrum non ſatis  
deterget. Recentem porro carnem nimis  
relaxat.

Indita cavis ulceribus linamenta, niſi  
balfamo aliquo prius imbuta ſunt, ultra  
debitum ſiccant. Eadem ut plurimum  
pulchre conveniunt, ubi caro recens boni-  
que coloris juſto citius increſcit,

Vulnere inſiſto, aut rupto apoſtemate,  
ſimulque etiam in omni fere ulcerum ſtatu,  
maximum



maximum adfert lenimen unguentum  
sequens. Non nimium deterget, ac par-  
ciores copia adhibitum carnem alit.

R. Unguent. basilic. nigr. Pharmacop. Lond.  
femunc.

Unguent. e gum. elemi ejusd. Pharmacop.  
Mel. Anglic.

singulorum unc. i.

Leni calore simul solvantur, et diligenter mi-  
sceantur, dum frigeant; ut fiat unguentum  
detergens, quod fratrem meum Joannem  
Fordyce auctorem agnoscit.

Non prætermittendum est, quod et  
alii animadverterunt, argentum vivum  
cum balsamo sulphuris tritum, in un-  
guento cæruleo fortiori Pharmacopœiæ  
Londinensis, ad luis venereæ sanatio-  
nem aliquando non sufficere.

Minime placet quadruplum axungiae  
porcinæ pondus in unguento cæruleo  
mitiori, propter summam difficultatem  
tantam ejus copiam ad siccitatem infri-  
candi.

## VULNERA.

**G**EORGIUS Oylett tertiæ cohortis prætorianæ miles, dum fœderatorum exercitus anno M, DCC, XLVIII ad Brabantia vicum Nessleroi castra haberet, in abdomine graviter acinace vulneratus erat. Interposita femihora, inveni eum magnam intestinorum partem, ne penitus evolverentur, cavo galero suffulcientem. Valde illa inflata, omentumque pulvere conspersum; ante quod discissum, in sedes suas intestina nullo modo condere potui, tametsi per se late patebat plaga. Ex cibo et potu, quibus se paulo ante liberaliter invitaverat, venustissima fane vasorum lacteorum facies per mesenterium disperforum. Repositis omnibus, quum sanguis satis multus ex omenti arteriis adhuc flueret, acu prælonga futuram feci interruptam dictam; id quod ægerrime fiebat,



fiēbat, propter sponte se retrahens peritonæum, et ipsam musculorum abdominalium crassitudinem. Fomentis adhibitis, oviumque recens cæsarum pellibus hominem in dies obvolvendo, in integrum is restitutus est.

## §.

Ejusdem cohortis decurio singulari certamine vulnus in regione gastrica accepit. Sanguis sursum deorsum ubertim redditus est. Putabant qui eum inviserunt principes castrenses chirurgi, cum ventriculo et jecur confossum. Repugnantibus omnium auguriis, asperi regiminis antiphlogistici ope ad sanitatem pervenit.

Diu invaluit opinio, immedicabilia esse ventriculi vulnera : quod non ex toto ita se habere hoc exemplum ostendit.

## §.

Adolescentulus, cujus eminebat genus, quum annos circiter quindecim haberet, ab equo excussus, mutus exceptus est,



offi parietali vulnere inflicto. Quæ subsequuta sunt indicia, apud chirurgum, cui commissa curatio est, non satis valebant, ut rem terebra tentaret. Abierunt sex menses. Paulatim deinde accedebant capitis dolores, demissio animi, graves nervorum affectus; quæ cum redeuntibus vere et autumno pari passu redibant. Post biennium alta infedit melancholia; desperatione mentem quandoque sic invadente, ut propinqua cognatione conjunctis, ne quid in se durius admitteret, metus injiceretur. Tum denique arcessitus, atque hæc omnia edoctus, familiam judicio meo impertivi: Veri nempe simillimum esse, cuncta ea symptomata inauspicato isti ex equo casui deberi, meque suspicari, calvariam membranis cerebrum contingentibus inniti adhuc et incumbere. Ideo perforandum esse duxi. In consilium postea adhibiti Cæsar Hawkins, Richardus Saunders, et Joannes Hunter, uno ore




ore consentiebant, ex illo ministerio multo plus bonæ spei adfulgere, quam periculi intentari: adeoque Joannes Hunter ad marginem depressæ cranii partis (restabat manifesta depressio) terebram adegit. Tulit æger constanti animo; regimine autem antiphlogistico mala quæque symptomata arcebantur. Quum vero non exempta esset nisi pars exigua ossis defidentis, quod nunc fractum fuisse, et contactu sui cerebrum violasse, certo comperimus; consultum visum est rem iterum aggredi, ut sublata residua parte, symptomata, quorum causa hanc primum instituissemus medicinam, penitus devincerentur. Adolescentulus constanter omnia ac fortiter; demptumque omnino est id quod ex offe jam facto crassiore reliquum erat. Ex hac altera perforatione acres admodum moti sunt dolores; quos excepit febris gravissima repetita sanguinis missione, et asperrimo regimine, tantummodo cohibenda. Discussa

cussa febre, æumnarum quas perpeſſus erat omnium is cito pretium cepit, mentis et corporis fanitatem incorruptam; qua hodie fruitur, haud ita pridem a Calpe reverſus, ubi, ſine ulla cerebri inter tot tormentorum militarium tonitrus offenſione, magno imperatore non indignum ſe militem præſtitit. Addere eſt, vix dum exciſum eſſe quod a prima perforatione ſupererat fruſtulum, quum ab omni ægritudine ſolutus miro quodam ac ſubito gaudeo exultaret.

F I N I S.
















A Sect  
No. 1  
Loring Newell

